

# Radisson Aruba Resort Casino & Spa ta lansa su celebracion di 50 aña di hospitalidad



**PALM BEACH** – Radisson Aruba Resort Casino & Spa lo ta marcando su di 50 aniversario e zomer aki. E hotel actualmente ta preparando pa e celebracion, cual lo inclui un fiesta formal di cocktail, riba dia 17 di juli, un publicacion di buki di potret, un evento di gala pa recauda fondo pa un bon causa, experencianan culinario retro y e introduccion di un bulletin board special riba e website di e hotel, unda coleganan y huespednan por pone nan potretnan y anecdotan, for di e ultimo cinco decadan. (<http://radisson-aruba.travelscreamforum.com/forumHome.aspx>)

E Aruba Tourism Authority y Aruba Hotel & Tourism Association tambe lo ta envolvi den e celebracion, ya cu e aniversario di Radisson ta tuma luga na mesun momento cu e conmemoracion di 50 aña di hospitalidad riba e isla.

At aki un les interesante di historia, danki na [www.historiadiaruba.aw](http://www.historiadiaruba.aw) pa a provee e siguiente informacion:

Aruba su prome hotel turistico tabata e Coral Strand na rand di Oranjestad, na caminda pa nos aeropuerto. El a habri na December 1943 y awendia ainda ta opera, conoci awo como e hotel amable, Talk of the Town Hotel.

E di dos hotel turistico tabata Hotel Scala cual a habri na Oranjestad na maart di 1949. Como resultado di e esfuerzonan inicial aki pa promove nos isla como un destinacion di vakantie y encurasha e creacion di facilidadnan di hospitalidad, Aruba su turismo a registra un cantidad record di 980 bishitante na 1950.

Na 1953, e Aruba Tourism Bureau a bira un agencia gubernamental y a cuminsa cu su mision di bida largo pa crea un demanda pa e isla. Aruba e tempo ey a conta cu solamente 100 cama di hotel, 42

na Coral Strand, 22 na Scala y 36 na Hotel Marchena, cual a habri durante e temporada aki.

E importancia pa e desaroyo di hotelnan dilanti lama a wordo reconoci durante e prome añanan di decada 50, inspira pa e exito di Miami Beach. Na 1953, un competencia oficial a wordo teni pa haya e miho diseño di un hotel turistico cual lo ta situa riba e playa magnifico y perfecto di Palm Beach. E plan ganador pa e “Basiroeti” lo mester a wordo financia pa gobierno, pero el a enfrenta hopi contratempo y a tarda te December 1954 pa por lanta for di tera. (E Basi Ruti Hotel a keda completa por fin na februari 1957 como un agrupacion low rise di bungalow situa riba a santo blanco di e birgen Palm Beach, unda Playa Linda Beach Resort ta para actualmente. Na 1965, Prinses Beatrix a hospeda na Basi Ruti durante su bishita riba nos isla.)

Hopi a wordo logra na 1954. E aña a marca e debuta di e prome campaña mega-promocional pa e isla na Merca. A distribui flyernan entre e agencianan di viahe na New York como tambe na e oficinanan di pasashi di KLM.

E campaña ambicioso tabata fructifero, y e fluho grandi y inespera di turista riba nos isla a crea un set nobo di problema, unda cu un scarcedad di auto di taxi a wordo reporta y kehonan pa loke tabata e tarifanan di hotel y aerolinea tambe a wordo registra, ya cu nan a wordo considera como mucho halto!

Aruba tambe a drenta e mundo di turismo crusero durante e tempo aki, ora cu na februari 1955, e “Tradewinds” a mara na e waf di Oranjestad. Mucha muhernan bisti cu shimisnan festivo tabata presente pa yama bonbini pa e bishitantenan di un dia cu a baha for di e barco, guiando nan door di e cayanen di Oranjestad. Henter e isla tabata presente pa wak e bishitantenan nobo y e cantidad di auto na playa a causa un paro

grandi di trafico na Oranjestad. Mas despues, barconan opera pa Grace Line a bira bishitantenan frecuente di e waf.

Na 1956, e gobierno di nos isla tabata hopi motiva y a aproba plannan pa e construccion di un hotel turistico di luho na Palm Beach, cual lo hiba e nomber Aruba Caribbean Hotel. Dos visionario local, Juan Enrique Irausquin – e homber cu a inspira e nomber di nos boulevard - y Oscar Henriquez – kende ainda ta cu nos, disfrutando di viahenan frecuente y su hardin di flor - a skirbi un rapport largo yena cu recomendacionnan pa loke tabata e construccion di e hotel aki. Nan a acumula informacion y inspiracion door di viaha pa Miami y Puerto Rico, y a dicidi riba un modelo apropiada pa Aruba su industria creciente di turismo. Tur dos a conclui cu Aruba su playanan ta esunnan miho, y cu e isla por pone su metanan mas halto, atrayendo ‘miho’ clientenan buscando luho, no economico.

Juancho Irausquin, kende tabata un politico den e partido di PPA cu e tempo ey tabata na mando, awendia ainda ta ser mira como e mente maestro tras di e explosion den Aruba su turismo. Como resultado di su esfuerzonan incansable, un planta gigantesco di desalinisacion a wordo traha, marcando e obtenibilidad di awa, cual tabata tristemente den scarcedad te e momento ey. E construccion di e caminda di Oranjestad pa Palm Beach tambe a wordo inicializa, haciendo transportacion mas facil. Na 1958, Aruba su bishitantenan a wordo transporta via un super-highway cual tabata core di e aeropuerto te fin di e playa, cu borchinan di trafico y camindanan secundario bayendo pa atraccionnan turistico manera Casibari Rock Formation y e Natural Bridge, cual a cai den otro. Oranjestad su caya principal a wordo haci limpi, unda cu dos bar di mal fama a wordo existi pa muda y habri otro caminda. Durante e temporada di Pasco na 1958, tur camber riba e isla tabata ocupa. Aruba tabata bon na caminda pa bira un marca, hasta prome cu e concepto di ‘branding’ a wordo inventa. was well on its way to becoming a brand, even before branding was invented

Den nan gran sabiduria, Irausquin y Henriquez a insisti riba un arquitecto celebridad pa diseña e hotel di nan soñonan, y e diseñonan pa e edificio, crea pa e arkitecto Mericano iconico, ganador di varios premio,

Morris Lapidus, a wordo aproba. Lapidus tabata e creador di hotelnan moderno cu ta Neo-baroque flamboyante cu hopi curva. E ta e genio cu a construi e Fontainebleau Hotel y e famoso Eden Rock na Miami Beach. E leyenda ta conta cu el a cana ariba y abou riba e playa kinan, studiando e direccion di biento, te ora cu el a kea satisfecho cu el a haya e luga perfecto. E mes a studia e tereno y a inicialisa e limpieza di e area unda awe Radisson Aruba Resort Casino & Spa ta situa.

Na honor di e proyecto benidero, Aruba su prome corporacion di finanzas y maneho a wordo registra, Aruven, cu dos accionista principal, esta e gobiernonan di Aruba y Venezuela. Den zomer di 1959 e gran apertura oficial di e Aruba Caribbean Hotel a tuma luga – si, 50 aña pasa - e tabata e prome hotel di luho na Aruba, consistiendo di 120 camber. E hotel a provee 160 cupo di trabou, di cual 120 a wordo ocupa pa hendenan local. E balansa di persona cu tabata traha pa e Caribe tabata gerentenan Mericano, kendenan a haya e tarea di maneha e casino elegante y moderno.

Den añanan 50 en general e area di Caribe a stimula e imaginacion di Merca su personalidadnan rico y famoso. Tabatin un interes creciente den e estilo di bida Caribense y na 1957 un rapport di gobierno a declara cu e islanan a bira e luga di hunga preferi pa Mericanonan. E explosion inespera di popularidad pa un gran parti tabata debi na e interes den musica di calypso y e mito cu a wordo crea pa e cantante sensacional Harry Belafonte.

E turistanan chic di Merca a

bishita e Caribe pa hunga den e olanan di lama – skiing riba awa tabata GRANDI - a adkiri un cuero bruin y briyante di solo, a bishita e Klompen Supper Club pa scucha cantantenan y artistanan popular, incluyendo Liberace, y comparti cenanan consistiendo di wedge salads y Beef Wellington. Durante e dia nan a haci un tiki compras duty-free, y e bebemento di rum. Harry Belafonte, Elizabeth Taylor y Eddie Fischer tabata algun di e bishitantenan regular di e ‘Gran Dama,’ manera e Aruba Caribbean Hotel, awo conoci como Radisson Aruba Resort Casino & Spa, tabata ser yama e tempo ey.

Aruba su promocion como un destinacion turistico mas despues a invadi cinemanan ya cu un pelicula promocional produci pa KLM na 1958 a establece e isla firmemente como un hungador mayor den e arena, un rol cu el a mantene pa e ultimo 50 añanan.

Naturalmente, ningun di e reinversionnan, cambionan y ahustacionnan continuo lo tabata posibel sin e hendenan ingenioso, cariñoso, hospitable, bon educa y amable di e isla aki. Hibando e industria den solamente 50 aña di 100 pa 8000 camber, mientras cu nan a mantene un tremendo producto turistico y un bon calidad di bida pa hendenan local, a rekeri un inteligencia profundo y e persistencia sigura di hendenan cu sa di unda nan a bin – for di tur caminda, y sa unda nan ta bayendo – pa un futuro briyante, yen di promesa, aunke lo tin contratemonan de bes en cuando.

Riba e potretnan por mira con tur cos a cuminsa, e diseño original y e logo di celebracion di Radisson Aruba Resort Casino & Spa.

